



UPA 2017/57
Nuuk, 03.05.2017
Mimi Karlsen

1. klassimiik meeqqat atuarfiisa tamarmik pinngitsooratik tuluit oqaasiinik takornartat oqaasiisut atuartitsisalernissaat qularnaarumallugu Meeqqat Atuarfiat pillugu Inatsisartut inatsisaannut nr. 15, 3. December 2012-imeersumut allannguutissamik saqqummiusseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.

Suliniutip tamatuma kinguneranik kalaallit danskillu oqaasiinik atuartitsineq ajorne-rulersinneqassanngilaq. Allannguut atuutilersinneqassaaq ukiup atuarfiusup 2018-mi aallartinneraniit.

(Inatsisartunut ilaasortaq Nivi Olsen, Demokraatit)

Inuit Ataqatigiit pingaartutut isigivarput ilisimasat misissuilluarnerillu aallaaviusassasut oqaatsinut tunngasunik nunatsinni allannguissagaangatta. Oqaluttuarisaanitsinni allamiut oqaasiinik ilikkarnissarput pingaartinnermik immitsinnut aallaaviginissarput puigortassanngilarput. Meerartagut paasisinnaasaannik tarrarsorfigisinnaasaannillu oqaluttuanik oqaatsiminnut ineriartuutissaannik periarfissagissaartittuuaannassallugit pisussaaffeqarpugut.

Siunnersuuteqartoq eqqortumik oqarpoq oqarami Kalaallit oqaasii Kalaallit Nunaanni pisortatigoortumik oqaasiusut. Oqarmalli kalaallit oqaasii ikittuinnarnit oqaaserineqartartut ikittuinnarnillu paasineqartarlutik oqaatigiumavara Nunatsinni najugaqartut 80 % kalaallisut oqalummata 20% danskisut allamiutulluunniit oqaluttuullutik.

Oqaatigisariaqarpara assersuutigalugu uanga atuartuuninniit ernuttama atuartuunerinut oqqaatsinik assigiinngitsunik atuartitsineq allanngorarsimaqimmat, allanngorarnerlu ilisimatusarnermik aallaaveqarani politikerit pingaartitaannit aallaaveqartarluni. Uanga atualerpunga danskisuinnaq atuartinneqarlunga, aatsaallu 3.klassimi kalaallisut atuartinneqalerlunga. Ilisimasassanik ilikkarniaqqaalerama oqaatsikka aallaavigineqarsimanngimmata uannik innarliisimasutut tamanna nalilertarpara.

Taamaammat isumaqarpunga 1.klassemiit tuluttoortalernissaq siusippallaarujussuortoq. Inuit Ataqatigiit pingaartipparput meeqqat atualernerginni oqaatsitik atorlugit atuartinneqarnissaat. Taamaasillutik oqaatsit atorlugit ilisimasaqarnermik, oqaasinngortitsisinnaanermik paasineqarnissamillu patajaatsumik atualerlaat atualernerginni pissarsisarniassammata.

Meeqqat atualeqqaarneranniit tusarnaarneqarnek, tusarnaarsinnaaneq, oqaloqatiginnissinnaanerlu ineriartortilluagassaapput. Tamanna patajaatsumik pereerpat meeqqat allamiut oqaasiinik imminnut tatigalutik ilikkarluarnerunissaat anguniartariaqarparput.

Siunnersuuteqartoq isumaqatigivarput oqarmat meerartatta allamiut oqaasiinik ilikkarnissaat, atuisinnaangornissaallu pingaaruteqartoq. Tamanna isumaqatigilluinnarparput. Isumaqatigilluinnarparput meerartatta danskisut tuluttullu pisinnaasaqalernissaat. Tamakkuli angunegasapput meerartatta patajaatsumik oqaatsivut atorlugit ilikkagaqarsinnaangorlutillu isumamaminnik anisitsisinnaangorpata. Ilitseqqussaralugu kalaallisut oqaatsivut meeqqat atuarfianni patajaatsunngortinngikkutsigit ernumagaarput meerartatta toqqammavissaat pataju-aatsuungitsoq aallartissallutigu. Kissaatigaarput meerartatta kalaallisut oqaatsivut ilikkarluarsimallugit allamiut oqaasiinik aatsaat ilinniartalernissaat. Aamma upperaarput nammineq oqaatsit nukittuffigigaanni aatsaat allamiut oqaasiinik nukittuunngortoqarsinnaanera.

Taamaammat Inuit Ataqtigiit siunnersuut itigartippaat.